



1^{MA} SESSIONE STRASURDINARIA DI U 2025
30 È 31 DI GHJINNAGHJU

1^{ère} SESSION EXTRAORDINAIRE DE 2025
30 ET 31 JANVIER

N° 2025/E1/008

**Question orale déposée par M Saveriu LUCIANI
au nom du groupe « Avanzemu »**

OBJET : Ghjennaghju di u 2025 : a lingua corsa à sicutera ?

O Sgiò Presidente,

Dipoi lugliu di u 2021, sia circa 1300 ghjorni, s'aspetta un fogliu di strada per a salvezza è a prumuzione di a nostra lingua nazionale.

Postu ch'è vo site, in logica, per avà incaricatu di stu cartulare, a mo dumanda, ch'ùn hè manc'à pena a prima in stu duminiu, aspetta l'ansciu d'una avviu serenu.

L'averete capita, stamane ùn anderemu per tante strade chì l'affare mi pare ch'ellu hà tricatu assai...

Hè sempre listessa funa. Di tantu in tantu i gruppi nazionalisti d'upposizione vi sulliciteghjanu nant'à l'andatura vostra per ciò chì tocca a glottopolitica è – mi dispiace di divvila – mi pare ch'è vo ci purtate da u fica à u peru.

Spartimu listessa primura, ma oramai sparte ùn basta più. U Corsu, a lingua di tutti, u Corsu, sta lingua per tutti, ferma un puntu fundamentale di a resistenza è di l'esistenza di stu populu.

Di pettu à u so statu maladicciu per ùn stà à dì in periculu di morte, ci vuleria à sapè s'ellu ci hè infine un'abboccu strategicu.

Un passu in daretu, da fammi capisce forse megliu chè cusì :

Ci aviate presentatu un raportu cusi dettu « raportu d'orientazione strategicu » di novembre 2022, cù u scopu, annunziatu tandu, d'un votu finale d'aprile 2023. Ma scorsu u veranu di u 2023, ùn s'hè vistu propiu nunda...

Più tardi, d'aprile 2024, ci hè statu un antru raportu, quellu di u travagliu di duie cummissione organiche, raportu senza votu à l'esciuta è battizatu « contribution au rapport d'orientation sur la politique linguistique ».

Ma dipoi, ch'omu voglia o nò, ne simu sempre à chi feremu...

Allora, vi turnemu à pone listesse dumande :

- A chi ne simu di u CPER è di l'investimentu impurtante previstu ?
- À chì ne site di l'elaborazione d'una convenzione lingua corsa, sapendu chì quella di u 2016 ùn vale più ?
- Di modu più largu, cum'hè ch'ellu ùn s'hè fattu, di modu rigulare, un bilanci di i dati di a rientrata sculare dipoi 3 anni, cù l'effettivi, a situazione è l'evuluzione statistiche di l'insignamentu di a lingua ?
- Cum'hè ch'ellu s'hè mai addunitu dipoi più di 3 anni u Cunsigliu Accademicu Territoriale in carica di a gestione di a lingua ?

O sgiò Presidente, si puderianu aghjustà tant'è tante quistione impurtante, ma per oghje ci basterà di palisà a nostra primura, quella di vede a cursufunia di st'isula piglià capu bonu.

Oghje ghjornu, aldilà di i discorsi, litanie, preghere è chjachjare, per disgrazia, dicu bè, per disgrazia, ùn s'avanza più.

A l'entre di stu 2025, ci serà forse per st'assemblea è i so ripresentanti mezu di turnà à discute cù Parigi di statutu d'ufficialità, d'un statutu accademicu derogatoriu, d'un'autunomia pulitica à cumpetenze nove.

Tantu megliu, ma in lu frattempu ? Iè, ma intantu ? A lingua aspetta è sò avà ancu trè anni è mezu ancu, s'omu conta bè.

In sta corsa contr'à u tempu, l'attesa chì ci rode, da generazione in quà à generazione in là, quant'è a pratesa chì ci porta da tant'anni, sempre è sempre, ci sustenenu di pettu à l'incertu destinu di stu populu. Aspettanu risposta piena. Aspettendu, ùn ci serà bisognu di spiegavvi ciò ch'elle diventanu e fune longhe...